

陸放翁全集

渭南文集

冊七



線

845.23

543

25

v. 17

舊籍





集



渭南文集



四部備要

集部

上海中華書局據汲古閣

本校刊

桐鄉 陸費達 總勘

杭縣 高時顯 輯校

杭縣 吳汝霖 校

杭縣 丁輔之 監造

傳

陸游字務觀越州山陰人年十二能宗文陸補登仕

郎鎖廳薦送第一秦檜孫壻適居其次檜怒至臯主  
司明年試禮部主事復置游前列檜顯黜之由是爲

所嫉檜歿始赴福州寧德簿以薦者除敕令所刪定  
官時楊存中久掌禁旅游力陳非便上嘉其言遂罷

存中中貴人有市北方珍玩以進者游奏陛下以損  
名齋自經籍翰墨外屏而不御小臣不體聖意輒私

買珍玩虧損聖德乞嚴行禁絕應詔言非宗室外家  
雖實有勛勞毋得輒加王爵頃者有以師傅而領殿

前都指揮使復有以太尉而領閣門事瀆亂名器乞  
加訂正遷大理寺司直兼宗正簿孝宗卽位遷樞密

院編脩官兼編類聖政所檢討官史浩黃祖舜薦游  
善詞章諳典故召見上曰游力學有聞言論剴切遂

賜進士出身入對言陛下初卽位乃信詔令以示人  
之時而官吏將帥一切翫習宜取其尤沮格者與衆

845.3  
503  
25  
v.17

10134763

國家圖書館



002452247

棄之和議將成游又以書白二府曰江左自吳以來  
未有捨建康他都者駐蹕臨安出於權宜形勢不固  
饋餉不便海道逼近凜然意外之憂一餓之後盟誓  
已立動有拘礙今當與之約建康臨安皆係駐蹕之  
地北使朝聘或就建康或就臨安如此則我得以暇  
時建都立國彼不我疑時龍大淵曾覲用事游爲樞  
臣張燾言覲大淵招權植黨熒惑聖聽公及今不言  
異日將不可去燾遽以聞上詰語所自來燾以游對  
上怒出通判建康府尋易隆興府言者論游交結臺  
諫鼓唱是非力說張浚用兵免歸久之通判夔州王  
炎宣撫川陝辟爲幹辦公事游爲炎陳取進之策以  
爲經略中原必自長安始取長安必自隴右始當積  
粟練兵有釁則攻無則守吳璘子挺代掌兵頗驕恣  
傾財結士屢以過誤殺人炎莫誰何游請以玠子拱  
代挺炎曰拱怯而寡謀遇敵必敗游曰使挺遇敵安

言始驗范成大帥蜀游爲參議官以文字交不拘禮  
法人譏其頽放因自號放翁後累遷江西常平提舉  
江西水災奏撥義倉賑濟檄諸郡發粟以予民召還  
給事中趙汝愚駁之遂與祠起知嚴州過闕陞辭上  
諭曰嚴陵山水勝處職事之暇可以賦詠自適再召  
入見上曰卿筆力回斡甚善非他人可及除軍器少  
監紹熙元年遷禮部郎中兼實錄院檢討官嘉泰二  
年以孝宗光宗兩朝實錄及三朝史未就詔游權同  
修國史實錄院同修撰免奉朝請尋兼祕書監三年  
書成遂陞寶章閣待制致仕游才氣超逸尤長於詩  
晚年再出爲韓侂胄撰南園閱古泉記見譏清議朱  
熹嘗言其能太高迹太近恐爲有力者所牽挽不得  
全其晚節蓋有先見之明焉嘉定二年卒年八十五



前輩有欲補詩史一字之闕終莫適其當者夫發言寓意未必惟一字之工或者窮思畢慮之弗逮人才相去乃爾遠耶

太守山陰陸先生劍南之作傳天下眉山蘇君林收拾尤富適官屬邑欲錄本爲此邦盛事迺以纂次屬師尹亦旣斂衽肅觀則浩渺閱肆莫測津涯掩卷太息者久之獨念吾儕日從事先生之門間有疑闕

自公餘可以從容質正幸來者見斯文大全用是不敢辭劍南詩彙六百九十四首續彙三百七十七首蘇君於集外得一千四百五十三首凡二千五百廿四首又□七首釐爲□十卷總曰劍南因其舊也文字傳襲失真類不滿意其如此書得之所見有以傳信而無疑若夫發乎情性充乎天地見乎事業忠憤感激憂思深遠一念不忘君先生之志且有

當世巨公爲之發揮非師尹敢任淳熙十有四年臘月幾望門人迪功郎監嚴州在城都稅務括蒼鄭師

尹謹書

宋板翻雕



跋

先太史之文於古則詩書左氏莊騷史漢于唐則韓  
昌黎于本朝則曾南豐是所取法然稟賦宏大造詣  
深遠故落筆成文則卓然自爲一家人莫測其涯涘  
蓋今學者皆熟誦劍南之詩續稟隆家藏世亦多傳  
寫惟遺文自先太史未病時故已編輯而名以渭南  
矣第學者多未之見今別爲五十卷凡命名及次第  
之旨皆出遺意今不敢紊乃鋟梓溧陽學宮以廣其  
傳渭南者晚封渭南伯乃自號爲陸渭南嘗謂子通  
曰劍南乃詩家事不可施於文故別名渭南如入蜀  
記牡丹譜樂府詞本當別行而異時或其散失宜用  
廬陵所刊歐陽公集例附于集後此皆子通嘗有疑  
而請問者故備著于此嘉定十有三年十一月壬寅  
幼子承事郎知建康府溧陽縣主管勸農事子通謹  
書

放翁富于文辭諸體具備惜其集罕見于世馬氏

通考載渭南集三十卷今不傳邇來吳中士夫有抄而秘其本者亦頗無詮次紹興郡有刻本去入蜀記溷增詩九卷據翁命子云詩家事不可施于文况十僅一二耶既得光祿華君活字印本渭南文集五十卷乃嘉定中翁効子通編輯也跋云命名次第皆出遺意但活板多謬多遺因嚴加讎訂并付剞劂自秋徂冬凡六月而書成湖南毛晉記

渭南文集總目

卷第一

表二十首

牋七首

卷第二

南宮表牋二十五首

卷第三

劄子十首

卷第四

劄子十二首

卷第五

奏狀八首

卷第六

啓十二首

卷第七

啓十六首

卷第八

啓十六首

卷第九

啓十六首

卷第十

啓十七首

卷第十一

啓二十三首

卷第十二

啓十五首

卷第十三

書九首


卷第十四

序十七首

卷第十五

序十七首

卷第十六



珍  
僑  
宋  
版  
注

碑六首

卷第十七

記十三首

卷第十八

記十一首

卷第十九

記十首

卷第二十

記十首

卷第二十一

記十首

卷第二十二

銘七首


記事一首

卷第二十三

傳三首

贊二十四首

青詞六首



疏二十一首

卷第二十四

疏二十九首

卷第二十五

祝文二十三首

勸農文三首

卷第二十六

雜書十二首

跋四十首

卷第二十七

跋四十九首

卷第二十八

跋四十一首

卷第二十九

跋四十一首

卷第三十

跋四十首

跋四十七首

卷第三十二

墓誌銘四首

卷第三十三

墓誌銘五首

卷第三十四

墓誌銘四首

卷第三十五

墓誌銘三首

卷第三十六

墓誌銘六首

卷第三十七

墓誌銘五首

卷第三十八

墓誌銘四首

卷第三十九

墓誌銘二首

墓表五首

壙記一首

卷第四十

塋銘八首

卷第四十一

祭文二十一首

哀辭二首

卷第四十二

天彭牡丹譜

致語六首

卷第四十三

入蜀記第一

卷第四十四

入蜀記第二

卷第四十五

入蜀記第三

卷第四十六

入蜀記第四

卷第四十

入蜀記第五

卷第四十八


入蜀記第六

卷第四十九

詞六十七首

卷第五十

詞六十三首





卷五十一

論六十一

卷四十六

人羅高葉六

卷四十六

人羅高葉六

卷四十六

人羅高葉六

渭南文集目錄

卷第一

天申節賀表

會慶節賀表

又

瑞慶節賀表

光宗冊寶賀表

皇帝御正殿賀表

皇太子受冊賀表

賀明堂表

謝明堂赦表

謝赦表

謝賜曆日表

又

福建到任謝表

江西到任謝表

嚴州到任謝表

除寶謨閣待制謝表

轉太中大夫謝表

謝致仕表

落職謝表

逆曦授首稱賀表

光宗冊寶賀太皇太后牋

皇帝御正殿賀皇后牋


皇帝御正殿賀皇太子牋

皇太子受冊賀皇后牋

賀皇太子受冊牋  
逆曦授首賀皇后牋

逆曦授首賀太皇太后牋

珍傲宋版印



渭南文集卷第一

宋陸游務觀

天申節賀表

化國之日舒以長運啓千齡之盛天子有父尊之至  
心均萬寓之驩敢卽昌期虔申壽祝中賀恭惟太上  
皇帝陛下宅心清靜受命溥將協氣熏爲太平華夷  
銜莫報之德孫謀以燕翼子宗社侈無疆之休誕敷  
錫於下民丕靈承於上帝臣方馳使傳阻綴朝班望  
睥表於雲霄敢恨微蹤之遠被頌聲於金石尚希薄  
技之陳

會慶節賀表

有王者興爰啓丕平之運使聖人壽敢忘胥戴之誠  
中賀恭惟皇帝陛下蕩乎無名建其有極干戈載戢  
恩加遼碣之區囹圄一空治格成康之上斂時百福

享國萬年臣迹滯遐陬心馳魏闕紀虹渚電樞之慶  
莫厠諸儒演龍宮葢笈之文徒修故事

又

帝生商而立子有開必先民戴舜以同心無遠弗屆  
乾端肇闢嶽貢交修中賀臣早以湖海之微生親見  
唐虞之盛典蓬轉逾二十年之久每注想於冕旒嵩  
呼上千萬壽之時獨阻陪於簪笏茲膺郡寄復在王  
畿目瞻佳氣之鬱葱耳聽驩聲之洋溢永言疎賤已  
極光榮恭惟皇帝陛下煥乎其有堯文粲然而興周  
道三朝圖籍將還滎河溫洛之都萬里車書已軼碣  
石榆林之壤以仁政廣華夷之德澤以豐年奉郊廟  
之牲牲凡曰含齒戴髮之儔均被淪肌浹髓之賜光  
御無疆之曆益培有永之年臣猥以分符莫遑造闕  
簫韶方奏徒傾就日之心歌頌可陳尚刻齊天之石

瑞慶節賀表

虹流電繞繞適當聖作之辰鼇抃嵩呼共效壽祺之祝

敢傾丹悃仰扣睿聰中賀恭惟皇帝陛下德當乾符躬有聖瑞東漸西被偉聲教之混同上際下蟠極仁恩之滲漉帝生商而立子民戴舜以同心歷考前聞孰逾盛際臣生逢千載仕歷四朝嶽貢川珍猥預駿奔之末鳶飛魚躍永依洪造之中

光宗冊寶賀表

龜食簞從考廟方嚴於典冊仗全樂備都人咸覲於禮容聖教茂昭驩聲旁達中賀恭惟皇帝陛下道參穹壤德肖祖宗稽周王小慈之求躬虞帝終身之慕父傳歸子有光盛舉於兩朝天定勝人果見太平於今日乃咨元老大臣之參訂兼采議郎博士之討論勒崇垂鴻極高蟠厚臣在列覩龍飛之旦紬書奏麟趾之篇際遇特殊等夷罕及旣莫預曲臺之議又阻從屬車之塵徒有悃誠形於夢想

皇帝御正殿賀表

肅傳清蹕端御昕朝德上際而下蟠澤東漸而西被

中賀恭惟皇帝陛下體天廣覆如日正中率禮無違  
永歎歲月遷流之速嚮明而治勉奮臣民愛戴之心  
諏太史涓吉之辰采奉常繇蒞之議對揚宗社之福  
爰舉公卿之觴兩曜清明四方抃舞臣農疇齒耄帝  
所夢遙華袞光臨雖莫望火龍黼黻之盛黃麾備設  
尚想聞金石絲竹之音

皇太子受冊賀表

明詔建儲永爲宗社之本正衙發策顯奮神祇之心  
國勢奠安輿情闡懌中賀恭惟皇帝陛下若稽古訓  
駿惠先猷壽考億年誕膺不蔽之福本支萬世坐擁  
無疆之休存心養性以事天修身齊家而治國迨舉  
有邦之慶益昭知子之明臣跡遠周行心馳魏闕命  
太史卜日之吉徒聞播告之傳遣上公持節以行莫  
預觀瞻之盛儻未辭於聖代尚自力於聲詩

賀明堂表

農扈屢豐協氣方流於縣宇合宮大享曠儀遂舉於

中天驛置星馳嵩呼雷動伏以聖神在御祈報間行  
肆嚴長至之祠一舉上辛之典惟茲宗祀實在季秋  
旣得萬國之驩心宜罄一精之嘉薦中賀恭惟皇帝  
陛下範圍元化斧藻太平采皇祐之舊章茂建中和  
之極稽紹興之新制用適古今之宜上帝顧歆殊休  
叢委臣官廩遐徼心繫明廷考漢家汶上之圖嗟莫  
陪於潤色繼周頌我將之作尚自力於形容

謝明堂赦表

明堂總章舉曠儀於路寢鈞陳羽衛敷大號於端闈  
德協穹祇春回海縣中謝恭惟皇帝陛下道繩祖武  
政酌民言乾文仰法於房心肇稱鉅典解澤默符於  
雷雨一洗衆愆統和天人空虛囹圄臣適乘使傳遠  
在遐陬奉五百里之驛書徒深鼇抃上千萬年之聖  
壽莫綴鳧趨

謝赦表

宣布仁恩發揚孝治觀人心之鼓舞知天意之協從

中謝恭惟皇帝陛下躬舜禹之資履曾閔之行損又損而至道老吾老以及人一日三朝雖極寧親之大養四方萬里尚憂庶獄之亡辜內廣惠心旁流霈澤雨露所被囹圄一空臣適以守藩恭聞孚號雖與民欣戴如瞻咫尺之天然受命禱祈實勞方寸之地

謝賜曆日表

春秋以王而次春不顯體元之妙閏月定時而成歲適當頒曆之辰治象一新歡聲四溢中謝恭惟皇帝陛下道兼倫制化被堪輿念王業之艱難每急農桑之務察天心之仁愛尤深水旱之憂誠意旣孚嘉生竝應呼嵩高之萬歲幸覩昌期陳泰階之六符不勝大願

又

詔班新曆雖舉彝章地近清都獨先下拜恩光旁燭小已知榮中謝臣聞堯授人時實前民用漢得天統克協帝心方當重熙累洽之盛時宜謹體元居正之

大典恭惟皇帝陛下凝圖丕赫受命溥將齊七政於  
璿璣昭示太平之象調四時之玉燭用待來歲之宜  
爰勅有司以幸天下臣偶叨牧養獲與布宣職思其  
憂勸課誓殫於綿力年運而往功名更感於初心

福建到任謝表

咸造在廷甫遂朝宗之願奉使有指遽叨臨遣之榮  
大造難名餘生曷報中謝伏念臣么然薄命起自窮  
閭偶以元祐之黨家獲與紹興之朝士真人有作景  
運方開適當寧歎息人才之實難顧一時豪傑號召  
而未至首蒙引對面錫殊科遭逢稀闊之知聳動邇  
遐之聽豈期蹇薄旋因沉綿卒繫全度之恩俾獲退  
藏之分侵尋半世轉徙兩川三爲別乘之行再忝專  
城之寄五十之年已過非復壯心八千之路來歸恍  
如昨夢敷陳淺拙應對參差惟譴黜之是宜豈超遷  
之敢望此蓋伏遇皇帝陛下道兼倫制澤被堪輿念  
臣留落有年尚未除於狂態憐臣馳驅無地空竊抱

於愚忠顧雖末路之孤蹤猶玷外臺之高選臣謹當力思守道深戒瘵官禮樂遠有光華既大踰於素望靖共好是正直庶少奮於鴻私

江西到任謝表

疏恩趣召靡待一人之言改命遣行猶備四方之使丹衷欲敘雪涕先傾中謝伏念臣稟資迂愚立身羈藐偶竊犁鋤之餘暇妄窺述作之淵源纍然自力於簡編老之將至過矣見稱於流輩轉而上聞頃入對於燕朝實親承於睿獎然而異恩賜第弗由場屋之選掄特旨造廷非出公卿之論薦已分亟投於閑散豈期重累於生成此蓋伏遇皇帝陛下立賢無方用人唯己一洗拘攣之積弊廣收魁傑之遺才施及妄庸亦蒙省錄甫停追詔還畀使爐凡曰自結於上知皆俾無蹈於後害海嶽之內纖塵墜露何所用之父母之愛幼子童孫蔑以加此驅馳入境感懼填膺重念臣樸學守株孤身吊影素乏蚍蜉蠃子之助孰爲

輪囷蟠木之容愴餘日之安歸抱微誠而永歎方天子建中和之極用告成功雖文史近卜祝之間亦思自效尚憑長育不遂棄捐所願預草漢家檢玉之文未敢遽同堯民擊壤之作劓肝自訴伏鑽何辭疾痛飢寒仰而呼天誓靡求於世俗齋戒沐浴可以事帝冀終望於清光

嚴州到任謝表

穿延和之細仗面只尺天佩新定之左符秩二千石叨塵過分感懼交懷中謝臣聞明主恩深書生命薄唐帝之知李白一官不及於生前漢皇之念相如遺稿徒求於身後況如臣輩莫望昔人猥緣一技之卑嘗綴百僚之末雖簪笏久違於昕謁乃姓名猶在於淵衷乘傳來歸兩奉召還之旨懷章欲上亟蒙趣對之榮親降玉音俯憐雪鬢勞其久別蓋寵嘉近侍之所宜勉以屬文實臨遣守臣之未有茲蓋伏遇皇帝陛下睿謨冠古英斷如神肆筆成書千載獨高於聖

學刺經作制諸儒絕企於清光以臣夙被化於明時  
憐臣未廢書於晚歲將激昂其素志故闕略於往愆  
臣敢不戴使愚使過之恩念有社有民之寄憩棠陰  
而聽訟期無墜於家聲及瓜戍而代歸尚少酬於君  
賜

除寶謨閣待制謝表

陪衆雋以登瀛已慙薄陋屣六飛而上雍遽踐高華  
恩重命輕感深涕賈中謝伏念臣材非異稟家本至  
寒蒼雅遺書守先臣之孤學莊騷奇作誦諸老之舊  
聞竊慕隱居求志之風尤恥譁世取名之事年運而  
往道阻且長仕止爲貧適遇四朝之盛際老猶不死  
遂爲六聖之遺民豈期垂盡之時更被非常之遇置  
之儒館命以信書特寬尸素之重誅不待汗青而加  
賞茲蓋伏遇皇帝陛下道兼倫制學備誠明體穹穹  
厚厚之仁躋蕩蕩巍巍之治風行雷動號令靡隔於  
幽遐魚躍鳶飛人材不遺於疏賤雖耄期之已迫尚

覆育之愈深臣敢不口誦訓辭心銘德澤入預甘泉  
之筆橐儻效微勞歸尋杜曲之桑麻終祈洪造

轉太中大夫謝表

信史奏篇獲紀兩朝之盛恩書馳驛躡躋四品之崇  
方釀賞之既行欲牢辭而弗敢始終忝幸俯仰競慙  
中謝伏念臣身出窮閭家承孤學披肺肝而自力雖  
有素懷賜骸骨以歸休已更累歲昨被出綸之命起  
參載筆之遊強耗昏廢忘之餘均筆削討論之責食  
常忘事但憂尸素之當誅成本因人乃以汗青而受  
寵茲蓋伏遇皇帝陛下奉先思孝守位曰仁夙受命  
於皇天克肖其德肆纂圖於列聖無疆惟休永懷弓  
劍之藏每切羹墻之慕爰求遺老俾誦舊聞而臣猥  
以耄期恭承訓勉愴大父詩書之業久已寂寥讀元  
豐文獻之言至於感泣雖迫蓋棺之日敢忘結草之

酬

謝致仕表

持橐甘泉已竊逢辰之幸挂冠神武又叨歸老之榮  
加恩俯念於耄年延賞特頒於申命伏讀絲綸之語  
曷勝犬馬之情中謝伏念臣家本窮閭世承孤學雖  
遇千齡之盛際初無一日之微勞白首光陰躡冠登  
瀛之選青雲步武亟陪上雍之班屬預奏於信書遂  
祈歸於故里奉祠雖佚竊食靡安茲游貢於忱辭始  
恭承於俞旨至於特捐異數增賁衰門顧令么微獲  
被榮耀茲蓋伏遇皇帝陛下仁參化育道極範圍繼  
粟繼肉以養賢才祝鯁祝噎以禮耆耄思正元之朝  
士寤寐不忘念山陰之老人生存無幾越拘攣於令  
甲聳觀聽於薦紳簡編有光世類知勸而臣抱痾牀  
第絕望闕廷賤息何能亦忝及親之祿素風未墜豈  
無報國之期

落職謝表

叨榮罪大念舊恩深僅鐫筆橐之華猶保桑榆之景  
仰慙鴻造下愧公言中謝伏念臣本出故家初無他

技每自求於遠宦豈有意於虛名命之多難動輒爲  
累強起僅餘於數月退歸又閱於六年齒豁頭童心  
勦形瘵叫閭請命蒙恩久許其乞骸飾巾待終視世  
已同於逆旅敢謂寬平之邦憲尚令漸盡於里居此  
蓋伏遇皇帝陛下勵精大猷惠養遺老念臣生當全  
盛被六聖之涵濡憐臣仕遇中興荷三宗之識拔雖  
名薄責益示殊私臣敢不祇誦訓詞痛懲宿負尸居  
餘氣永無再瞻軒陛之期老生常談莫敘仰戴丘山  
之意

逆曦授首稱賀表

天無私覆實均父母之仁邦有大刑爰下風雷之令  
英斷若神明之速成功無晷刻之淹氛稜澄清頌聲  
洋溢中賀臣伏以高皇有作王室中興方大戎窺蜀  
以憑陵賴驍將奮身而守衛念功無已分闔相承仰  
累朝寵數之非常雖舉族糜捐而曷報豈圖小醜自  
取參夷僭服自如改元無憚受封割地已北通獯鬻

之庭置戍奪符欲東扼瞿唐之險罪不勝於擢髮誅  
寧貸於闔門肆推曠蕩之恩實自聖神之造恭惟皇  
帝陛下德配天地功光祖宗覽圖籍而動容每念兩  
京之未復奉廟祧而霑涕不忘九世之深讎蠹茲籬  
卵之微自投鼎鑊之地人情共憤天討遂加蒞醢以  
賜諸侯雖特寬於漢法頭顱之行萬里已大震於戎  
心遙知羣醜宵遁之餘無復竝塞秋防之警臣身歸  
南陌名寓西清馳驛四傳徒快鯨鯢之戮造朝旅賀  
莫趨鸛鷺之班

光宗冊寶賀太皇太后牋

諏穀日於清臺著龜允協奉鴻稱於考廟典冊有嚴  
慶襲重闈驩騰函寓恭惟太皇太后殿下道同先后  
德著累朝閱天下義理之深體坤元光大之盛密扶  
睿斷纂修列聖之治功備述先猷啓迪一人之達孝  
舉時大典紹國成規臣斂迹還東馳心拱北紳綏雜

皇帝御正殿賀皇后牋

聖治聿新爰正路朝之御邦儀丕舉實繫內助之功  
盛典告成函生胥慶恭惟皇后殿下道隆任姒化洽  
邦家方當宁之朝羣臣惟聖時克宜中壺之介萬壽  
與天同休內騰六寢之驩外副萬方之望臣久違近  
著獲遇昌辰聽九賓之臚傳莫陪抃舞望五雲之宮  
闕徒極傾輸

皇帝御正殿賀皇太子牋

清蹕肅九賓之儀方臨當宁寶觴奉萬壽之祝允屬  
儲宮邦家有光華裔同慶恭惟皇太子殿下道隆孝  
友性極誠明以大學爲家傳一洗俗儒章句之陋以  
密贊爲子職豈獨寢門櫛縱之恭相此多儀實先百  
辟某久嬰沉疾已迫頽齡想廣殿之崇巖莫陪襜翼  
占前星之明潤徒極傾馳

皇太子受冊賀皇后牋

壺政憂勤協贊上聖登三之治母慈顧復遂開東宮

明兩之祥汗簡光華函生鼓舞恭惟皇后殿下道光  
圖史化被宮闈嗣先后之徽音體柔祇之厚載媯汭  
之降二女允謂盛時周臣之止九人實資內助迨此  
建儲之命益知儷極之尊臣自去通班久安故里頽  
齡耄矣莫陪執玉之趨鉅典煥然不勝拭目之喜

賀皇太子受冊牋

父慈子孝集大慶於我家日吉時良發正衙之顯冊  
國勢重於九鼎驩聲達於四方恭惟皇太子殿下秉  
德淳明宅心虛靜英姿達識事洞照於幾先強記博  
聞言必稽於古訓躬守累朝仁恕之訓日侍兩宮晬  
穆之顏歷考古初實爲創見某夙叨四品垂及九齡  
爲國老農莫筮濟濟鸛鸞之列逢時盛典尚懷區區  
犬馬之心

逆曦授首賀太皇太后牋

叛臣干紀敢萌負固之心密詔行誅不待崇朝之久  
慶宗社喜益宮庭臣以參井之虛古兮重地亦

高帝東巡之始實羣胡南牧之秋爰有驍雄服勞疆  
圍惟列聖念功之意每示優隆度故臣誓報之心豈  
有窮已蠢茲微孽亦荷異恩入居宿衛之聯出任師  
干之寄天所助者順乃懷悖逆之圖人不食其餘自  
掇殲夷之譴尚全遺族實出上恩恭惟太皇太后殿  
下坤厚資生母儀燕翼每道先朝之家法助成聖主  
之性仁慰在天之靈故誅其孥而無赦廣及物之澤  
故宥其族而弗疑臣久屏窮閭猶叨近侍用三有宅  
欣逢湯德之寬於萬斯年莫預堯封之祝

逆曦授首賀皇后牋

逆臣負固上貽正宁之憂密詔行誅不待靈旗之指  
勳高古昔喜溢宮庭伏以分闔專征本倚世臣之舊  
野心叵測輒干邦憲之嚴妖禽自取於覆巢靡草獨  
枯於長夏尚加矜貸曲示涵容故雖同產之親止用  
徙鄉之典恭惟皇后殿下道光媯汭德配坤元侍膳  
慈闈克謹晨昏之奉焦心中壺每分宵旰之勞及此

成功允爲大慶聳裔夷之觀聽增竹帛之光華臣久  
已歸耕莫陪入賀身修家齊國治實由內助之功天  
時地利人和行觀外攘之烈

渭南文集卷第一

渭南文集目錄

卷第二

丞相率文武百僚請建重明節表

又

又

立皇后丞相率文武百僚稱賀壽皇表

賀皇帝表

賀皇太后牋

賀壽成皇后牋

賀皇后牋

文武百僚謝春衣表

重明節明慶寺丞相率百僚啓建道場疏

開起

滿散

進疏

會慶節明慶寺丞相率百僚啓建道場疏

開起

滿散

進疏

文武百僚謝冬衣表

會慶節丞相率文武百僚賀壽皇表

丞相率文武百僚賀至尊壽皇聖帝冬至表

丞相率文武百僚賀皇帝冬至表

丞相率文武百僚請皇帝聽樂表

丞相率文武百僚賀皇太后受冊牋

丞相率文武百僚賀壽成皇后受冊牋

丞相率文武百僚上皇帝賀三殿受冊表

丞相率文武百僚賀壽皇正日表

丞相率文武百僚賀皇帝正日表

# 渭南文集卷第二

丞相率文武百僚請建重明節表

飛龍在天方仰君臨之德流虹繞渚實開聖作之祥  
宜紀昌辰用彰盛際恭惟皇帝陛下承謨丕顯受命  
溥將致養三宮備本朝之家法參決萬務得率土之  
民心正寧初臨積陰頓解於赫明離之象益昭出震  
之符臣等不勝大願請以九月四日爲重明節伏望  
皇帝陛下俯察羣情亟頒俞旨施尊名建顯號侈穹  
旻發祥之期披皇圖稽帝文臣民歸美之報著之  
令甲副在有司邦家增光天下幸甚

又

受命若帝之初宜邦彝之悉舉盛德如天之覆豈人  
欲之或違比罄忱辭願標令節未回聰聽曷慰羣情  
伏以紀千秋之名雖由唐舊允長春之請則在宋興  
況今非獨循累代之成規蓋亦以此侈重華之大慶

顯號缺而未講盛日鬱而弗彰謙雖益光禮則未稱  
伏望皇帝陛下茂昭鉅典亟發德音漢殿尊榮親奉  
玉卮之壽周行抃蹈各陳金鑑之書豈惟光簡冊之  
傳實以副天下之望

又

淵聽未回確爾執謙之意忱辭屢叩歉然歸美之誠  
彝典不可以久稽衆心不可以屢拂敢控喁喁之請  
再干穆穆之光竊以民之戴君自古有訓禮之飾治  
後世尤詳惟大德得其名故因誕彌而紀節雖先王  
未之有亦容增益之隨時當渚虹樞電之辰受岳貢  
川珍之集乃同常日夫豈人情今者博士議郎固執  
於廷秩宗奉常各揚其職必期得請疇敢自安伏望  
皇帝陛下聖度兼容大明委照帝辭三祝足昭挹損  
之懷臣同一心終冀允俞之命

立皇后丞相率文武百僚稱賀壽皇表

北宮移仗方簷與子之廟中禁正名復奉齊家之訓

化行繇宇驩動羣心中賀恭惟至尊壽皇聖帝陛下  
盛德日新聖圖天廣雖名持守躬創業垂統之難不  
憚憂勤示詒謀燕翼之法乃者獨觀道妙將就葆頤  
猶崇朝親發於德音謂初政莫先於內治茂建壺則  
所以垂萬世之典常大明人倫所以移四方之風俗  
臣等獲塵朝著親奉睿謨發冊昕廷共仰光華之典  
稱觴廣殿益深抃舞之情

賀皇帝表

寶運紹開椒塗首建典冊以時而告具著龜協吉而  
弗違慶集宮庭懽傳海宇中賀伏以聖人有作追參  
堯舜禹之盛時壺範增光上配姜任姒之至德矧惟  
內助始自初潛稽女史彤管之言廣周南關雎之化  
茲正中宮之位號實出壽皇之訓謨玉音誕敷汗簡  
登載求於前世邈矣未聞顧家國之榮懷宜神祇之  
安樂恭惟皇帝陛下仁參蒼昊德被黔黎永惟大學  
齊家之端先誠其意推原春秋謹始之義以御于邦

故當天臨之初務先坤載之厚臣等身逢華旦目覩  
彌文燕至祀謀行慶則百男之祐雞鳴問寢敢祝於  
萬年之休

賀皇太后牋

聖子問安方極蘭陔之養神孫正內肇新椒掖之華  
母道彌尊人情溢喜中賀恭惟皇太后殿下抱神以  
靜藏心於淵德修蠅蝓蠖濩之中化行崑崙磅礴之  
外唐虞盛際迺出一家父子之親任姒徽音仍見三  
朝婦姑之法方且享宗社奠安之福視本支蕃衍之  
祥於古有光與天無極臣等幸逢熙運獲綴清班至  
哉坤元寶首彝倫之敘養以天下益觀孝治之隆

賀壽成皇后牋

盛德繼承爰本親傳之妙中宮崇建式光就養之尊  
慶集禁庭驩傳海宇中賀恭惟壽成皇后殿下婦功  
飭備母道含洪躬老氏之儉慈享周家之福祿密贊

思於靜順故備極於安榮袞龍兼綵服之紆綸翟煥  
玉卮之奉貴無倫敵日以舒長簡冊燁其有光風俗  
爲之不變臣等偶逢熙運獲相多儀坤順承天喜徽  
音之克嗣孫又有子知壽祉之無窮

賀皇后牋

誕受丕基方正宁凝旒之始協修陰教舉路朝發冊  
之儀厚載有光羣情咸悅中賀恭惟皇后殿下慶鍾  
勳閎道媿皇家輔佐積勤實自龍潛之日休祥有衍  
早符熊夢之占壽皇所以親發於德音聖主所以深  
資於內助副笄奉二殿之養大練受六宮之朝震耀  
簡編感移風俗臣等預聞鉅典實激歡悰法地所以  
法天仰戴坤儀之至德事母同之事父曷勝鰲抃之  
微誠

文武百寮謝春衣表

寶運紹開方謹人時之授寵光下逮俾均春服之成  
榮被簪紳歡騰拜舞中謝恭惟皇帝陛下凝圖丕赫

撫運重熙租稅所儲靡專一己之奉寒暑有賜式厚  
羣臣之恩所以恤其澣濯之私蓋將責其忠嘉之報  
雖舊章之是舉實初政之當先臣等獲綴班聯恭承  
錫予去女工之蠹已觀府庫之充遺天下之衣願廣  
乾坤之施

重明節明慶寺丞相率百僚啓建道場疏

開起

乾端澄肅時爰及於杪秋離照光明運方隆於中夏  
敢輸誠悃仰祝壽齡皇帝陛下恭願宜君宜王時萬  
時億泰元增漢帝之筴配天其休洪範錫神禹之疇  
與民同福

滿敬

肅霜協令方觀萬寶之成繞電告祥寶契千齡之會  
飭供旣周於月律殫誠爰集於廷紳冀憑薰被之勤  
仰報照臨之德皇帝陛下恭願政敷有截壽格無疆

大易明兩作離允符繼照之盛太極函三爲一誕擁  
無疆之休壽何待於禱祠運自臻於熙洽恭演仙真  
之祕旨實輸臣子之至情皇帝陛下恭願化旨羣倫  
治偕邃古奉親備天下之養履位處域中之尊至誠  
之道可以前知方卜億萬年之永命諸福之物莫不  
畢至豈止百千所之上聞

會慶節明慶寺丞相率百僚啓建道場疏

開起

有開必先天地肇興於景運無遠弗屆華夷畢効於  
貢琛況在周行敢稽壽祝至尊壽皇聖帝陛下伏願  
道超古昔化洽黔黎端居無黃屋之心旣高揖遜萬  
葉致綵衣之養彌極尊榮

滿散

電樞肇紀適逢震夙之期月琯告周游罄延鴻之禱  
雖嘉祥之自至顧歸美之敢稽至尊壽皇聖帝陛下

伏願福等河沙壽踰劫石堯仁舜孝治功永煥於青  
編天大佛尊粹表長臨於黼辰

進疏

天爲羣物之祖可謂極尊壽居五福之先實歸上聖  
脫屣親傳於大寶頤神方御於殊庭敢率羣倫恭培  
睿算至尊壽皇聖帝陛下伏願誕膺戩穀端拱穆清  
以八千歲而爲春永享舒長之景卜七百年而過曆  
茂隆貽燕之祥

文武百僚謝冬衣表

霜露旣降著孟冬始裘之文法制具存舉九月授衣  
之令進趨襜翼拜舞光華中謝恭惟皇帝陛下大度  
并包至仁滲漉及是月也初有祁寒之虞念無衣兮  
俾膺好賜之厚疏恩榮於在列斥府庫之餘藏臣等  
誤荷選掄獲霑錫予覩萬里農桑之業共樂時乎誦  
羣臣幣帛之詩誓圖忠報

鈞羨無疆不顯生商之日成功不處適當命禹之時  
熙運親逢羣情胥慶中賀恭惟至尊壽皇聖帝陛下  
仁涵動植道配堪輿詩書所稱何有加卓爾規模之  
大唐虞之際斯爲盛超然揖遜之風積勤致王業之  
成端拱視天民之阜豈特極高而蟠厚固已勒崇而  
垂鴻臣等誤寘周行久陶聖化蓬萊隔弱水三萬里  
獲進謁於殊庭上古有大椿八千秋冀默符於睿算  
丞相率文武百僚賀至尊壽皇聖帝冬冬至表

化國之日舒以長一陽初復天子之父尊之至萬壽  
維祺亞歲肇新羣心胥悅中賀恭惟至尊壽皇聖帝  
陛下道兼倫制化極範圍剛長而亨周測土圭之景  
功成則退堯無黃屋之心薰然慈孝之兼隆允矣古  
今之莫及方且內享視膳問安之大養外騰重熙累  
洽之頌聲風動華夷光昭竹帛臣等幸逢盛際獲造  
昕廷斗建子以定時是爲嘉會星拱辰而在列同罄  
丹誠

丞相率文武百僚賀皇帝冬至表

一之日以授時黃鐘合律萬斯年而介福赤伏膺符  
慶集邦家驩騰海寓中賀恭惟皇帝陛下仁同乾覆  
道協時樂旦復旦以重光邦圖有永新又新而不倦  
帝德難名默觀造化之機自得財成之妙清心省事  
成歸根反本之功任賢去邪體進陽消陰之象臣等  
幸逢熙運獲邇威顏和氣先回豈待葭灰之應豐年  
已兆敢陳雲物之占

丞相率文武百僚請皇帝聽樂表

祖廟寧神歲浹更於燧火禮經有制時當備於簫韶  
敢控微衷上干淵聽伏以中月而禪壽皇已循不易  
之規逾年改元聖主方受惟新之命儻未舉鈞天之  
奏何以慰率土之懷伏望皇帝陛下俯察忱辭仰稽  
故典欲聞五聲八音六律以復朝廷之常親帥三公  
九卿諸侯共致慈闈之請笙鏞以間而人神喜琴瑟

奉萬年之觴於廣殿及此首春撞千石之鐘於大庭  
震於四海

丞相率文武百僚賀皇太后受冊牋

獻歲發春太史奏元龜之吉展案錯事東朝慶大典  
之成佳氣一新驩聲四溢中賀恭惟壽聖皇太后殿  
下聰明睿智壽富康寧踐履躋難難佐高廟廓清之烈  
遵行恭儉啓壽皇詒燕之圖肆因初元祇奉顯冊璽  
篆蟲魚之古樂陳鐘磬之和內而百官有司方屏息  
而觀盛事外則萬方黎獻咸拜手而頌闕休載稽前  
聞可謂盡美臣等偶叨在列獲際升平有子而又有  
孫共仰本支之盛視今猶之視昔前知竹帛之傳

丞相率文武百僚賀壽成皇后受冊牋

宮壺塗椒德配重華之盛冊書鏤玉禮行路寢之嚴  
聖孝益隆輿情交慶中賀恭惟壽成皇后殿下儉慈  
性稟柔順躬行至哉坤元象服早光於內治養以天  
下寢門方奉於母儀今者稽參六籍之文博盡諸儒

之議建此顯號邁於前聞仰惟貴無敵而富無倫是謂仁之至而義之盡臣等偶緣在列獲遂逢時紀媯汭塗山之興幸窺簡牘繼生民思齊之作尚播聲詩丞相率文武百僚上皇帝賀三殿受冊表

重慶有光仰東朝之慈愛雙親竝奉極北內之尊榮正歲肇新彌文告備邦家之喜夷夏所同中賀伏以堯舜禹之相承蓋非一姓姜任姒之善繼又不同時參稽前聞孰擬昭代恭惟皇帝陛下奄有萬寓統和三靈由至公大義膺寶運之傳講禋威盛容伸天下之養太史灼龜而獻兆曲臺縣蒞而具儀黃麾之仗夙陳簪紳在列白玉之冊時舉金石充庭旣已隆孝道而通神明固將禮高年而厚風俗新又新而進德老吾老以及人臣等誤被選掄獲塵班著雖潤色討論於大典每慙稽古之疎然登降跪拜於路朝實竊逢辰之幸

道妙混成太極著兩儀之本天端更始三朝受萬國  
之歸慶集有邦歡騰率土中賀恭惟至尊壽皇聖帝  
陛下濬哲稽古清明在躬握乾符闡坤珍難名蕩蕩  
之德系唐統接漢緒誕受丕丕之基以海宇之富而  
蹈巢由高世之風以父子之親而行堯舜曠代之事  
迨此獻歲發春之日實繫攷圖數貢之時史冊增華  
摺紳太息臣等幸承睿獎獲覩昌期鵷行畢集於大  
庭共喜威顏之近龍袞恪趨於小次更知榮養之尊  
丞相率文武百僚賀皇帝正旦表

堯授舜舜授禹方瞻繼照之明正次王王次春茂舉  
履端之慶乾坤開闢日月光華中賀恭惟皇帝陛下  
德上際而下蟠化東漸而西被改元定號稽列聖之  
舊章發政施仁撫重熙之景運內有可封之俗外無  
不讓之戎方且采諸儒之議以制朝儀陳九奏之音  
以爲親壽頌朔靡殊於遐邇受圖克拱於穆清治功  
卓然海內幸甚臣等誤膺睿獎獲綴通班勩力同心

永惟春秋五始之義拜手稽首敢奏天子萬年之詩

珍做宋版印

渭南文集卷第二

渭南文集目錄

卷第三

蠟彈省劄

論選用西北士大夫劄子

代乞分兵取山東劄子

上二府論事劄子

又 上殿劄子

又

又

擬上殿劄子

上二府乞勿受慶雲圖劄

子

上二府論都邑劄子



渭南文集卷第三

蠟彈省劄

癸未二月二府請至都堂撰

朝廷今來特惇大信明大義於天下依周漢諸侯及唐藩鎮故事撫定中原不貪土地不利租賦除相度於唐鄧海泗一帶置關依函谷關外應有據以北州郡歸命者卽其所得州郡裂土封建大者爲王帶節度鎮撫大使賜玉帶金魚塗金銀印其次爲郡王帶節度鎮撫使賜笏頭金帶金魚塗金銅印仍各賜鐵券旌節門戟從物元係蕃中姓名者仍賜姓名各以長子爲節度鎮撫留後世世襲封永無窮已餘子弟聽奏充部內防團刺史亦令久任將佐比類金人官制升等換授其國置國相一員委本國選擇保奏當降真命餘官准此七品以下聽便宜辟除土地所出並許截留充賞給軍兵祿養官吏等用更不上供每歲正旦一朝三年大禮一助祭如有故聽遣留後或

國相代行天申會慶節止遣國官一員將命應刑獄  
生殺並委本國照紹興勅令參酌施行更不奏案合  
行軍法者自從軍法四京各用近畿大國兼充留守  
朝廷惟於春季遣使朝陵餘時止用本處官吏侍祠  
每遇朝貢當議厚給茶綵香藥等充回賜以示撫存  
遇一國有警急諸國迭相救援如開斥生地俘獲金  
寶並就賜本國仍永不置監司帥臣及監軍等官候  
議定各遣子弟一人入覲當特賜燕勞畢卽時遣回  
機會之來時不可失各宜勇決以稱朝廷開納之意  
論選用西北士大夫劄子

臣伏聞天聖以前選用人才多取北人寇準持之尤  
力故南方士大夫沉抑者多仁宗皇帝照知其弊公  
聽並觀兼收博采無南北之異於是范仲淹起於吳  
歐陽修起於楚蔡襄起於閩杜衍起於會稽余靖起  
於嶺南皆爲一時名臣號稱聖宋得人之盛及紹聖  
崇寧間取南人更多而北方士大夫復有沉抑之歎

呼瓘之言天下之至言也臣伏觀方今雖中原未復然往者衣冠南渡蓋亦衆矣其間豈無抱才術蘊器識者而班列之閒北人鮮少甚非示天下以廣之道也欲望聖慈命大臣近臣各舉趙魏齊魯秦晉之遺才以漸試用拔其尤者而任之庶上遵仁祖用人之法下慰遺民思舊之心其於國家必將有賴伏惟留神省察取進止

### 代乞分兵取山東劄子

臣等恭覩陛下特發英斷進討京東以爲恢復故疆牽制川陝之謀臣等獲侍清光親奉睿旨不勝欣抃然亦有惓惓之愚不敢隱默者竊見傳聞之言多謂虜兵困於西北不復能保京東加之苛虐相承民不堪命王師若至可不勞而取若審如此說則弔伐之兵本不在衆偏師出境百城自下不世之功何患不成萬一未至盡如所傳虜人尚敢旅拒遺民未能自

拔則我師雖衆功亦難必而宿師於外守備先虛我猶知出兵京東以牽制川陝彼獨不知侵犯兩淮荆襄以牽制京東邪爲今之計莫若戒敕宣撫司以大兵及舟師十分之九固守江淮控扼要害爲不可動之計以十分之一遴選驍勇有紀律之將使之更出迭入以奇制勝俟徐鄆宋毫等處撫定之後兩淮受敵處少然後漸次擲大兵前進如此則進有闢國拓土之功退無勞師失備之患實天下至計也蓋京東去虜巢萬里彼雖不能守未害其疆兩淮近在畿甸一城被寇尺地陷沒則朝廷之憂復如去歲此臣所以夙夜憂懼寢不能瞑而爲陛下力陳其愚也且富家巨室未嘗不欲利也然其徒欲賈于遠者率不肯以多貲付之其意以爲山行海宿要不可保若傾囊而付一人或一有得失悔其可及哉此言雖小可以

喻大願陛下留神察焉臣等誤蒙聖慈待罪樞筦攻

上二府論事劄子 壬午六月五日

某伏見大理寺奏北界蒙城縣官邢珪罪狀竊緣有司之議據其侵犯邊城殺害義旅雖置極典未足當罪然既已具奏則當有特旨恐與有司之議不可同日而語何者有司謹守律令朝廷當斷以大義故也按邢珪生於涿易非祖宗涵養之人仕於僞界非國家祿使之吏身有官守一旦危急力雖不及猶能死守雖懵於逆順不知革面然春秋之義天下之善一也若遂誅之恐非所以勸天下之爲人臣者奏陳之際儻爲一言貸其草芥微命以示中國禮義實非小補又慮議者以謂張安國殺耿京事與此略同恐啓寬貸之路無以慰歸附之人則某謂不然張安國中國人又嘗受旗榜招安見利而動賊殺耿京反覆姦猾罪惡明白與珪實爲不類兼邢珪所犯在未被大赦蕩滌之前張安國所犯在已受旗榜招安之後伏

乞鈞察

上殿劄子三首 壬午十一月

臣恭惟陛下天縱聖智生知文武御極之初內出大號所以加惠於海內甚渥猶以爲未足也乃八月戊子寬恤之令繼下至誠惻怛纖悉備具歡欣之聲達於遠邇可謂盛矣然今旣累月不知有司皆已推而致之民乎若猶未也是不免爲空文而已無乃不可乎又有大不可者陛下初卽大位乃信詔令以示人之時前日數十條或曰當寘典憲或曰當議根治或曰當議顯戮可謂丁寧切至赫然非常之英斷也若復爲官吏將帥一切翫習漫不加省一旦國家有急陛下詔令戒敕之語將何加此而欲使人捐肝腦以衛社稷乎周官冢宰以正月之吉始和布治於邦國都鄙垂象之法徇以木鐸曰不用法者國有常刑正月周正今之十一月也正歲夏正今之正月也自十一月至正月若未甚久而申敕告戒矣以刑律已如

此其屬公命下其人而有言或怙然之以爲意  
惑之欲望聖慈以所下數十條者申論中外使恪意  
奉行毋或失墜仍命諫官御史及外臺之臣精加考  
覈取其尤沮格者與衆棄之不惟聖澤速得下究亦  
使文武小大之臣聳然知詔令之不可慢如此實聖  
政之所當先也伏惟留神省察取進止

又

臣聞夏尚忠商尚質周尚文三者迭用非以爲異因  
時制宜有不得不然者臣竊觀太祖太宗之世法度  
典章廣大簡易律令可以禁奸無滋彰之患文移可  
以應務無叢委之弊君臣上下如家人父子論說徑  
直誠意洞達所詳者大所略者小事易舉功易成其  
氣象風俗人物議論至於今可考也太平旣久日趨  
於文放而不還末流愈遠浮虛失實華藻害道雖號  
爲粲然備具而文移書判增至數倍居官者窮日之  
力實不暇給猾吏奸人乘隙以逞其始也所詳者小

所略者大其極也并小者不復能詳則一切鹵莽聽  
吏之所爲而已太上皇帝中興大業當宁歎息思有  
以救之於是漸加訂正以還其舊兩省復通爲一以  
革迂滯之風寺監幾省其半以去支離之害簡禮容  
刪律令規模措置蓋欲悉除繁文復從祖宗之質而  
後已有司奉承未能盡如本指此陛下今日所當力  
行不可緩也臣愚欲望聖慈明詔輔臣使帥其屬因  
今六曹寺監百執事所掌講求祖宗舊制以趨於廣  
大簡易之域繁碎重複無益實事者一皆省去使小  
大之臣咸有餘力以察姦去蠹修舉其職則太平之  
基自此立矣元祐中司馬光請改三省職事一如昔  
日中書之制蘇轍亦請收昔日三司之權悉歸戶部  
則臣所謂因今所掌以求祖宗舊制誠不爲難顧陛  
下力行何如爾干冒天聽伏深戰慄取進止

又

之子孫者宜皆取法焉然而獨曰儀刑文王又曰儀式刑文王之典漢自高帝創業其後嗣亦多賢君然史臣獨曰漢言文景美矣至武帝之功烈猶以不遵文景之恭儉爲恨唐三百年一祖三宗皆號盛世而太宗正觀政要之書獨傳寶以爲大訓元祐中學士范祖禹亦曰祖宗畏天愛民子孫皆當取法惟仁宗在位最久德澤深厚結於天下誠能專法仁宗則成康之隆不難致也嗚呼祖禹之言天下之至言也迨我太上皇帝躬履艱難慨然下詔專法仁祖之政且竊聞燕閑惟考觀仁祖政事是以於萬斯年無疆惟休亦享仁祖垂拱之福可請盛矣陛下紹休聖緒正當師太上專法仁祖之意申命邇英進讀之臣日以寶訓反覆敷繹以究微意仍命輔臣政事法度一以仁祖爲法臣將見陛下福祿川至治效日見年穀屢豐四夷率服慶曆皇祐之盛復見於今雖遐方絕壤皆當梯航而至矣況中原故地其有不復者哉臣不

勝至願伏惟聖慈留神省察取進止

擬上殿劄子

壬午准備輪對會內禪遂不果上

臣觀小毖之詩見成王孜孜求助特在初載意其臨天下之久閱義理之多則當默識獨斷雖無待於羣臣可也及考之書然後知其不然舜伐三苗年九十有三聞伯益一言則退而敷文德舞干羽無一毫自用之意武王受貢紜年九十有一召公作訓累數百言武王納之不以爲過嗚呼爲人臣而不以舜武王望其君者不恭其君也伏以陛下生知之聖度越百王稽古之學博極墳典歷試諸難身濟大業更事閱理多矣自公卿大臣皆陛下四十年教養所成況於小儒賤士見聞淺陋曾何足以仰清光備顧問哉然其所陳則未必無尺寸之長何者舉吏部之籍摺紳之士幾人其得見君父者幾人自伯首州縣而不得一

望闕門者多矣則凡進見之人固宜夙夜殫思竭誠

其設心亦願際會犯威顏以徇俗捨富貴以取名臣竊謂無是理也欲望陛下昭然無置疑於聖心克己以來之虚心以受之不憚捨短而取長以求千慮之一得庶幾下情得以畢達羣臣無伯益召公之賢陛下以舜武王之心爲心則是聖德巍巍過於舜武王矣如其屈萬乘之尊躬日昃之勞顧於疎遠之言無大施用姑以天地之度容之而已是獨言者一身之幸也干冒天威臣無任惶怖俟罪之至

上二府乞勿受慶雲圖劄子

癸未春

伏覩尚書省劄子知閩州呂游問奏慶雲見并圖一軸奉聖旨降付編類聖政所仰見主上聖孝推美太上皇帝之心然竊聞太上皇帝建炎之初京東進芝草親詔却之盛德煌煌光映簡冊今乃以慶雲見爲聖政恐非太上皇帝之本意兼閩州所奏專以慶雲見於普安郡及在主上卽位前一日爲受命之符諛佞牽合不識大體政與京東芝草相類若受而不却

雖不報行其誰不知深恐自此草木之妖氛氣之怪  
緯候之說歌頌之文紛紛來上却之則自啓其端不  
却則遂將成俗欲望鈞慈以太上皇帝却芝草故事  
委曲奏陳主上剛明英斷必有以處此矣干冒鈞嚴  
不勝恐怖之至

上二府論都邑劄子

某自頃奏記迨今累月自顧賤愚不肖無尺寸可以  
上補聰明而徒以無益之事上勤省閱實有罪焉故  
久不敢以姓名徹左右今者偶有拳拳之愚竊謂相  
公所宜聞者伏冀少留觀覽幸甚幸甚伏聞北虜累  
書請和仰惟主上聖武相公威名震疊殊方足以致  
此而天下又方厭兵勢且姑從之矣然某聞江左自  
吳以來未有捨建康他都者吳嘗都武昌梁嘗都荆  
渚南唐嘗都洪州當時爲計必以建康距江不遠故  
求深固之地然皆成而復毀居而復徙甚者遂至於  
敗亡相公以爲此何哉天造地設山川形勢有不可

易者也車駕駐蹕臨安出於權宜本非定都以形勢則不固以餽餉則不便海道逼近凜然常有意外之憂至於讖緯俗語則固所不論也今一和之後盟誓已立動有拘礙雖欲營繕勢將難難某竊謂及今當與之約建康臨安皆係駐蹕之地北使朝聘或就建康或就臨安如此則我得以閑暇之際建都立國而彼既素聞不自疑沮黠虜欲借以爲辭亦有不可者矣今不爲後且噬臍至於都邑措置當有節目若相公以爲然某且有以繼進其說不一二年不拔之基立矣某智術淺短不足以議大計然受知之深不敢自以疎遠爲疑干冒鈞聽下情恐懼之至

# 渭南文集卷第三



渭南文集目錄

卷第四

上殿劄子

又

又

乞祠祿劄子

上殿劄子

上殿劄子

又

又

除修史上殿劄子

又

乞致仕劄子

又



卷第四

歐陽文忠公目錄

# 渭南文集卷第四

## 上殿劄子

臣聞善觀人之國者無他惟公道行與否爾書曰毋虐烝獨而畏高明詩曰柔亦不茹剛亦不吐此爲國之要也若夫虐烝獨畏高明茹柔吐剛而能使天下治者自古未之有也朝廷之體責大臣宜詳責小臣宜略郡縣之政治大姓宜詳治小民宜略賦斂之事宜先富室徵稅之事宜覈大商是之謂至平是之謂至公行之一邑則一邑治行之一郡則一郡治行之天下而治不逮於古者萬無是理也伏見朝廷頃因人言必顯有功狀乃畀職名行之數年而大臣近侍不得職者幾人帥臣監司之加職者又比比而有至於銓曹格法所以厄小官者則未嘗少弛張也慶典之行所及至廣貼職以上例皆甄復雖阿附秦氏得罪者亦在焉至於常調孤遠固多久絀刑憲者今更

赦令雖使皆得霑被銓法拘攣必不如是之曠蕩也  
無乃責大吏反略而責小臣反詳乎郡縣之吏不能  
自立觀望揣摩惟強是畏豪右雖犯重辟官吏貪者  
黠者則公與之爲市廉者懦者則又自營曰得無反  
爲所害乎凡嫁禍平人諉罪僮奴者皆有司爲之道  
地也凶年饑歲雖貧富俱病然富者利源至多貧者  
惟守田畝孰爲當恤視郡縣之庭鞭笞流血扭械被  
體者皆貧民也吳蜀萬里關征相望富商大賈先期  
遣人懷金錢以賂津吏大舸重載通行無苦終更小  
官造廷進士垂橐蕭然齎糧有限而稽留苛暴略不  
之恤如是謂之平可乎謂之公可乎臣昧死伏望陛  
下推至平至公之道自朝廷始然後下詔戒敕四方  
而繼之以誅賞不過歲月治效自見惟在陛下執之  
重如山嶽堅若金石爾苟卿論闢國之說曰兼并易  
能也堅凝之難夫豈獨兼并哉凡爲政施行之甚易  
堅凝之甚難臣區區之言陛下或以爲萬有一可采

焉敢併以堅凝爲獻取進止

又

臣伏讀御製蘇軾贊有曰手扶雲漢幹造化機氣高天下乃克爲之嗚呼陛下之言典謨也軾死且九十年學士大夫徒知尊誦其文而未有知其文之妙在於氣高天下者今陛下獨表而出之豈惟軾死且不朽所以遺學者顧不厚哉然臣竊謂天下萬事皆當以氣爲主軾特用之於文爾趙普氣蓋諸國故能成混一之功寇準氣吞醜虜故能成却敵之功范仲淹氣壓靈夏故西討而元昊款伏狄青氣懾嶺海故南征而智高殄滅至於韓琦富弼文彥博之勳勞唐玠包拯孔道輔之風節大抵以氣爲主而已蓋氣勝事則事舉氣勝敵則敵服勇者之鬪富者之博非有他也直以氣勝之耳今天下才者衆矣而臣猶有憂者正以任重道遠之氣未能盡及古人也方無事時亦何所賴此一日或有非常陛下擇羣臣使之假鉞而

董二軍擁節而諭萬里雖得賢厚篤實之士氣不素  
養臨事惶遽心動色變則其舉措豈不誤陛下事耶  
伏望萬機之餘留神於此作而起之毋使委靡養而  
成之毋使沮折及乎人才爭奮士氣日倍則緩急惟  
陛下所使而已且吳蜀閩楚之俗其渾厚勁朴固已  
不及中原矣若夫日趨於拘窘怯薄之域臣實懼國  
勢之寢弱也不勝私憂犯分獻言恭惟陛下裁赦取  
進止

又

臣聞天下有無窮之變而有必然之理惟默觀陰察  
能得其理則事變之來雖千態萬狀可以坐制而無  
虞矣天下之變最幽眇倉卒不可測知者莫如雷霆  
鬼物然雷震冬伏而春作鬼物晝隱而夜見則其理  
之必然有不待智者而知之矣今朝廷內無權家世  
臣外無強藩悍將所慮之變惟一金虜虜禽獸也謫  
詐反覆雖其族類有不能測而臣竊以謂是亦有可

必知者夫何故寬猛之相繼如寒暑晝夜之必相代也故自金虜猖獗以來靖康建炎之間窮凶極暴則有紹興之和通和既久則有辛巳之寇寇而敗亡則又有隆興之和今邊陲晏然枹鼓不作逾二十年與紹興通和之歲月略相若矣不知此虜終守和約至數十百年而終不變邪將如晝夜寒暑必相代也且虜非中國比也無君臣之禮無骨肉之恩惟制之以力劫之以威則羸能少定今力憊勢削有亂而已其亂不起於骨肉相殘則起於權臣專命又不然則奸雄襲而取之耳三者有一焉反虜酋之政以悅其國人且何爲哉雖陛下聰明英睿自有所處然臣竊觀士大夫之私論則往往幸虜之懦以爲安不知通和已二十餘年如歲且秋矣而謂衣裘爲不必備豈不殆哉大抵邊境之備方無事時觀之事事常若有餘一旦有變乃知不足伏望陛下與腹心之臣力圖大計宵旰弗怠繕修兵備搜拔人才明號令信貴罰常

如羽書狎至兵鋒已交之日使虜果有變大則掃清燕代復列聖之讎次則平定河洛慰父老之望豈可復如辛巳倉卒之際斂兵保江凜然更以宗社爲憂邪臣世食君祿且蒙陛下省錄姓名已二十餘年念無以報天地父母之大恩故其陳於陛下者惟懼不盡而不知狂愚之爲大罪也取進止

乞祠祿劄子

戊申四月

照對某昨任主管成都府玉局觀將滿陳乞再任蒙恩差知嚴州於淳熙十三年七月三日到任郡政乖刺雨澤不時上勞宵旰死有餘責賴蒙朝廷哀矜山郡瘠土之民重賜蠲放廣行賑恤上格和氣下安衆心入秋得雨陸種倍收六縣並無流徙人戶今春以來雨暘尤爲調適二麥繼熟民間亦以爲所收倍於常年賑濟訖事稍紓吏責某雖去替不遠實緣年齒衰邁氣血凋耗夏秋之際痼疾多作欲望鈞慈特賜矜憫許令復就玉局微祿養痾故山及天氣尚涼早

待就道實爲至幸

上殿劄子

臣恭惟陛下躬聖人之資履天子之位而致養三宮承顏左右盛事赫弈冠映千古尚何待塵露之增山海哉顧臣竊抱惓惓之愚不敢輒默伏惟陛下聖孝純至稟於天性昔在潛邸及登儲宮以來夙夜孜孜何嘗頃刻不以壽皇爲心壽皇罷朝而悅進膳而笑則陛下欣然喜動於色壽皇罷朝而不悅進膳而少味則陛下愀然憂見於色方是時徒能喜之憂之而已今則致親之悅者責在陛下其可以不深念乎所謂悅親之道非薦旨甘奉輕暖也非晨昏定省冬夏溫清也非千門萬戶之宮鈞天簫韶之樂也惟在陛下得天下之愛戴以寧壽皇之心而已雞鳴而攬衣辨色而視朝必曰此昔者問安之時也今以萬機之繁不能日朝重華歉然於懷豈有限極然闕問安之常禮之小也致天下之治孝之大也吾其力爲其大

者乎此固壽皇所望於陛下亦天下所望於陛下也  
治功已成中外無事陛下時備法駕率羣臣上萬年  
之觴豈非天下之大慶不然太史或以災異上聞四  
方或以寇盜來告壽皇聞之萬分有一微輟玉食陛  
下雖居萬乘之貴孰與解憂哉臣昧死願陛下於進  
退人才罷行政事之際率以是爲念自三思十思以  
至百思不爲過也自一日五六日至於旬日不爲緩  
也謀及卜筮謀及卿士謀及庶人不爲廣也一有小  
失豈獨上勞宵旰壽皇亦與焉故陛下今日憂勤恭  
儉百倍於古帝王乃僅可耳譬如臣民之家上有尊  
親則所以交四隣訓子弟備饑饉禦盜賊比之他人  
自當謹戒百倍何則彼亦懼憂之及其親也犬馬小  
臣貪於增廣聖孝不知言之涉於狂妄冒犯天威伏  
候斧鉞

又

臣聞詩曰上天之載無聲無臭人君與天同德惟當

清心省事澹然虛靜損之又損至於無爲大臣不得而窺所好則希合苟容之害息小臣不得而窺所好則諂諛側媚之風止不以從其所好而加賞則儉人伏不以逆其所好而加罪則端士進玩好無益之物不好則不接於目談諧敗度之言不好則不聞於耳大抵危亂之根本讒巧之機芽姦邪之罅隙皆緣所好而生臣下雖有所偏好而或未至大害者無奉之者也人君則不然絲毫之念形於中心雖未嘗以告人而九州四海已悉向之矣況發於命令見於事爲乎且嗜好之爲害不獨聲色狗馬宮室寶玉之類也好儒生而不得真則張禹之徒足以爲亂階好文士而不責實則韋渠牟之徒足以敗君德其他可推而知矣昔者漢文帝及我仁宗皇帝所以爲萬世帝王之師者惟無所嗜好而已恭惟陛下龍飛御極之初天下傾耳拭目之時所當戒者惟嗜好而已無有作好遵王之道天之所以錫神禹也伏惟陛下留神省

察實天下幸甚取進止

上殿劄子 己酉四月十二日

臣聞王者以一人之身臨制四海人情錯出事變還至惟靜以俟之則心虛而明惟重以持之則體大而正無偏聽之過無輕舉之失天何言哉舜何爲哉後世士大夫學術卑陋識慮褊淺顧謂王者得位必有以聳動天下於是厭常喜新之論興飾智駭俗之政作衆人之所喜而君子之所深憂也臣伏見陛下自在潛邸以至龍飛御宇三十年間天下之事何所不習雖日出百令固亦易爾乃謙恭退託而安靜無爲沉潛淵默而聰明不作上則承壽皇之睿謨下則盡羣臣之公議及乎議有未決徐而斷之政有當行從而舉之理愜事允出臣下思慮之表有心者誠服有口者頌歎則所謂靜與重者陛下旣得之矣嗚呼一郡一邑之長視事之始尚且以新奇眩衆以敏速釣名陛下有天下之利勢而不用有聖智之絕識而不

施超越羣倫奚啻萬億而或者方以聳動天下爲獻此固兒童之見而陛下所不取也竊恐羣臣獻此說者寢多雖陛下決不取然臣不勝惓惓愛君之愚忠思有以堅聖心而廣初政昔魏鄭公憂正觀之政漸不克終蘇轍亦謂但如元祐之初足矣若夫進銳退速能動耳目之觀聽而無至誠惻怛之心以終之如明皇之焚錦繡德宗之放馴象實陛下之龜鑑也故臣願陛下圖事揆策不厭於從容行賞議罰無取於快意兢兢業業常如此三月之間則成康文景之盛復見於今日矣犬馬小臣出位妄言冒犯天威臣無任

又

臣聞天下有定理決不可易者飢必食渴必飲疾必藥暑必簋豈容以他物易之也哉臣伏觀今日之患莫大於民貧救民之貧莫先於輕賦若賦不加輕別求他術則用力雖多終必無益立法雖備終必不行

以臣愚計之朝廷若未有深入遠討犂庭掃穴之意能於用度之間事事裁損陛下又躬節儉以勵風俗則賦於民者必有可輕之理緩急之備固不可無姑以歲月徐爲之可也如是則和氣浹洽必無水旱之災籬聲洋溢必無盜賊之警何慮國用之不足邪設使裔夷弗賓侵犯王略所謂率其子弟攻其父母直可舞干羽而格之爾頃者建炎紹興戡定變亂之日一切賦斂有非承平之舊者高宗皇帝宵旰焦勞每欲俟小定而悉除之故詔令布告天下曰惟八世祖宗之澤豈汝能忘顧一時社稷之憂非予獲已止俟捍防之隙首圖蠲省之宜臣幼年親見民誦斯詔至於感泣雖傾貲以助軍興而不敢愛旋屬國家多故逆亮畔盟雖所蠲已多終未仰稱聖意壽皇聖帝臨御以來所以節用裕民者皆繼承高宗蠲省之指也則陛下今日豈可不以爲先務哉臣昧死欲望聖慈恢大度明遠略詔輔臣計司博盡論議量入而用量

有非常孰不樂輸以報君父淪肌浹髓之恩哉若有  
事之時旣竭其財矣幸而無事又曰儲積以爲他日  
之備也雖恢復中原又將曰邊境日廣矣屯戍日衆  
矣則斯民困弊何時而已邪瀆犯天威罪當萬死惟  
陛下裁赦取進止

除修史上殿劄子

臣伏見真宗皇帝至道三年冬修太宗實錄至明年  
咸平元年八月而畢甫九閱月修書者錢若水柴成  
務宗度吳淵楊億五人而已書成又詔重修太祖實  
錄至明年六月而畢亦甫九閱月修書者王元之梁  
灝趙安仁李宗諤四人而已臣竊考之太祖討澤潞  
取楊州平吳滅蜀定荆楚下五嶺太宗撫有吳越蕩  
定汾晉用師薊門問罪夏臺皆大舉動業廣事叢議  
論煩委兵機戎政攻守餽餉功罪黜陟之事可謂夥  
矣至於制禮作樂明刑治曆修廢官舉墜典革五季

之弊復漢唐之盛側席求治可謂勤矣宜其摹寫日月形容造化雖累歲不成而奏書之速不淹三時上足以慰羹墻之思下足以厭薦紳之望非獨此數人者畢精竭思之力也意者當時命令重刑賞必尊君體國之俗成凡史官紬繹之所須者上則中書密院下則百司庶府以至四方萬里郡國之遠重編累牘如水赴海源源而集然後以耳目所接察隧碑行述之諛辭以衆論所存刊野史小說之謬妄取天下之公去一家之私而史成矣九閱月而奏書臣誠未見其爲速也臣乞身累年忽蒙聖恩起之山澤之間使與聞大典旣不累以他職又特寬其朝謁責委之意可謂重矣然臣之愚慮有欲陳者未敢遽以仰瀆天聽而略具梗槩於前欲乞聖慈明詔大臣俟臣供職有所陳請擇其可者出自朝廷主張施行如臣不能

自才曠職空食聖俸具竄死之刑所不重遊耳進止

乞致仕劄子

癸亥

晚蒙旒展之知爰錫弓旌之召濫司汗簡擢長僊蓬  
曾未幾時亟躋近列雖願輪於塵露顧已迫於桑榆  
記問荒疎文辭衰退重負夜行之責難貪晝接之榮  
又況與奏成書獲經睿覽時則可矣敢少緩於控陳  
天寶臨之冀俯從於懇款伏望聖慈許臣守本官職  
依前致仕

又  
癸亥

臣近緣實錄院進書已畢具奏乞守本官職依前致  
仕準尚書省劄子奉聖旨不允者伏念臣學緣病廢  
志與年衰步蹇弗支髮存無幾出入鷓行之內惕然  
有覩於面顏追參豹尾之間觀者亦爲之指目豈容  
冒昧久竊寵榮敢干咫尺之威洵貢再三之請萬籟  
黃卷悵已負於初心十具烏犍冀獲安於故里伏望  
聖慈特賜開允

又  
甲子

臣輒傾愚懇仰達聖聰伏念臣衰頽餘齡已開九秩  
遭逢盛際逮事四朝擢寘周行初出高皇之獨斷進  
登法從晚蒙陛下之異知期歲強顏秋毫無補及瀝  
乞身之請更蒙優老之除久此叨塵豈勝危懼雖天  
地之恩未報而犬馬之力已窮杜曲桑麻儻遂扶犁  
之初願灞橋風雪更尋策蹇之舊遊誓教訓於子孫  
用報酬於君父伏望聖慈許臣守本官職致仕

卷第五

天申節進奉銀狀

辭免賜出身狀

又

條對狀七條

奏筠州反坐百姓陳彥通訴人吏冒役狀  
除寶謨閣待制舉會黯自代狀

辭免轉太中大夫狀  
薦舉人材狀



渭南文集卷第五

天申節進奉銀狀

效頌祝於萬年適逢盛際備貢輸於九牧敢竭微誠  
前件銀祗率典章獲參包篚大庭旅百愧非梯山航  
海之琛神嶽呼三但切就日望雲之意

辭免賜出身狀

准尚書省劄子奉聖旨賜進士出身者孤遠小臣比  
蒙召對從容移刻褒稱訓諭至於再三仰惟天地父  
母之恩固當誓死圖報惟是科名之賜近歲以來少  
有此比不試而與尤爲異恩揣分量材實難忝冒欲  
望敷奏特賜追寢以安冗散之分

又

近蒙恩賜進士出身嘗具狀乞行追寢以謂科名之  
賜近歲以來少有此比不試而與尤爲異恩揣分量  
材實難忝冒今月六日准尚書省劄子奉聖旨不許

辭免螻螳至微曲煩申諭雷霆在上其敢飾辭然義有未安若不自列強顏冒寵獲罪愈大蓋特賜科名雖有故事必得非常之人乃副非常之舉甚非所以重儒科杜倖門也重念某一介疎賤行能亡取比蒙召對面加訓獎退而感激至於涕泗今者但使獲安冗散之分以效尺寸之勞則於上報主恩不敢憚死

條對狀

准今月六日詔書節文令侍從臺諫取當今弊事悉意以聞退率其屬極言毋諱臣恭依詔旨條具下項一有國之法當防其微人臣之戒尤在於偏異姓封王偏之尤者也蓋封王始於漢初天下未定權宜之制然韓彭英盧皆以此敗漢亦幾至大亂遂與羣臣盟曰非劉氏不王後世懲創其失魏晉隋唐皆起草昧有天下豈無功臣止於公侯而已國

初道辛不元稹一人可云字云二力二身七身并才王始於安祿山而本朝則始於童貫此豈可法而

詔有司自今非宗室外家雖實有勳勞毋得輒加  
王爵藏之金匱副在有司永爲甲令寶宗社無疆  
之福

一伏見比來朝廷間遣小臣幹辦於外旣銜專命  
又無統屬造作威福矜詫事權所在騷然理有必  
致如措置酒坊招捕海賊未有毫髮成效而擾害  
之事已饜滿聞聽則此事害多利少可以無疑若  
以輕君命失國體言之則雖有厚利亦不可行臣  
謂如此二事之類止當專委戶部長貳轉運司及  
安撫使提點刑獄措畫如其不職自有典憲誠不  
足一一上煩聖慮昔祖宗置走馬承受本欲便於  
奏報耳而小人恃勢日增歲長及改稱廉訪使者  
則監司帥守反出其下敗亂四方危及社稷實走  
馬承受之末流也可不畏哉此事乞陛下與輔臣  
長慮遠計亟行廢罷若止如近日改易其人及令

聽安撫使節制之類根本未除終必爲害若朝廷  
或有大事勢須遣使卽乞於廷臣中遴選材望庶  
幾不負任使不啓弊端實天下之幸

一自古有國設官分職非獨下不得僭上上亦不  
得侵下所以正名分也公師之官將相之位人臣  
之至貴天子所尊禮非百官有司比也方宣和間  
王黼以太宰而行應奉司蔡攸以三孤而直保和  
殿紊亂之事遂爲禍萌中興以來所宜痛革而頃  
者遂有以師傅而領殿前都指揮使者天下固已  
怪矣近復有以太尉而領閣門事者閣門古之中  
涓太尉服章班列蓋視二府瀆亂名器莫此爲甚  
欲乞聖慈詔輔臣議之例加訂正著爲定制亦革  
弊所當先也

一伏觀詔書委監司條具部內知州治行仰見陛  
下無恤百姓欲使冬令日星之意然臣竊謂惟賢  
乃可以知賢而無瑕者乃可以議人不審今之監

陟無乃未可乎雖使諫官御史劾奏其不當者然  
人之讖見自有分限若本無才智又無學術乃使  
品藻賢否而劾其不當是猶強盲者使察秋毫而  
責其不見也臣欲望聖慈令三省具諸路監司姓  
名精加討論其不足當委寄者例皆別與差遣選  
有才智學術之士代之則前日之詔不爲空文既  
一清監司之選又審知郡守之政實今日先務也  
一伏覩律文罪雖甚重不過處斬蓋以身首異處  
自是極刑懲惡之方何以加此五季多故以常法  
爲不足於是始於法外特置凌遲一條肌肉已盡  
而氣息未絕肝心聯絡而視聽猶存感傷至和虧  
損仁政實非聖世所宜遵也議者習熟見聞以爲  
當然乃謂如支解人者非凌遲無以報之臣謂不  
然若支解人者必報以凌遲則盜賊蓋有滅人之  
族者矣蓋有發人之丘墓者矣則亦將滅其族發

其丘墓以報之乎國家之法奈何必欲稱盜賊之殘忍哉若謂斬首不足禁姦則臣亦有以折之昔三代以來用肉刑而隋唐之法杖背當時必亦謂非肉刑杖背不足禁姦矣及漢文帝唐太宗一日除之而犯法者乃益稀少幾致刑措仁之爲效如此其昭昭也欲望聖慈特命有司除凌遲之刑以明陛下至仁之心以增國家太平之福臣不勝至願

一臣恭以陛下仁心惻怛聖澤深廣四方萬里之遠昆蟲草木之微生成長養惟恐或傷近者天下奏獄雖盜賊姦蠹罪狀已明一毫可寬悉蒙原減豈有無辜就刑而不加恤者臣是以不量疎賤敢昧死有請夫宦侍之臣自古所有然晚唐以來始進養子童幼何罪橫罹刀鋸古制宮刑之慘纔下大臣一等是雖顯有負犯猶在所希而況於童幼乎向使宿衛不足供奉闕人暫開禁防尚爲有說

加未聞限止誠恐非陛下愛人恤物蕃育羣生之意也臣伏觀太祖皇帝開寶四年詔內侍官年三十無養父聽養一子并以名上宣徽院違者抵死真宗皇帝咸平中復申前詔仁宗皇帝嘉祐四年又詔入內內侍省權罷進養子三聖詔令炳如丹青遵而行之實在陛下且方今聖政日新入無苑囿之觀出無逸遊之好諸軍無承受諸路無走馬中人所領不過兩宮掃除之職而已顧久弛成憲以從其私干犯至和虧損仁政臣雖其愚猶知其不可也伏惟聖慈少留聽焉

一自古盜賊之興若其因水旱饑饉迫於寒餓嘯聚攻劫則措置有方便可撫定必不能大爲朝廷之憂惟是妖幻邪人平時誑惑良民結連素定待時而發則其爲害未易可測伏緣此色人處處皆有淮南謂之二禳子兩浙謂之牟尼教江東謂之

四果江西謂之金剛禪福建謂之明教揭諦齋之類名號不一明教尤甚至有秀才吏人軍兵亦相傳習其神號曰明使又有肉佛骨佛血佛等號白衣烏帽所在成社僞經妖像至於刻版流布假借政和中道官程若清等爲按勘福州知州黃裳爲監雕以祭祖考爲引鬼永絕血食以溺爲法水用以沐浴其他妖濫未易概舉燒乳香則乳香爲之貴食菌蕈則菌蕈爲之貴更相結習有同膠漆萬一竊發可爲寒心漢之張角晉之孫恩近歲之方臘皆是類也欲乞朝廷戒敕監司守臣常切覺察有犯於有司者必正典刑毋得以習不根經教之文例行闊略仍多張曉示見今傳習者限一月聽齋經像衣帽赴官自首與原其罪限滿重立賞許人告捕其經文印版令州縣根尋日下焚毀仍立法凡爲人圖畫妖像及傳寫刊印明教等妖妄經文者並從徒一年論罪庶可陰消異時竊發之患

奏錫州及坐百姓陳彥通訴人吏冒役狀

臣近因民間詞訴勘會到本路錫州百姓陳彥通因  
訴事夾帶稱高安縣押錄陳諒經兩次徒杖罪斷罷  
不合冒役事其本州於淳熙六年十月內以爲陳彥  
通所論冒役不實遂引用乾道六年八月二日臣僚  
陳請妄訴冒役科反坐刑名仍引在法諸州縣公人  
曾因犯罪勒停謂於法不該收敘及未該收敘者放罷編配  
再行投募充役者許人告諸州縣收敘公人於令格  
有違者徒二年公人依法不該收敘而隱落過犯或  
改易姓名別行投募者准此將百姓陳彥通決脊杖  
十三臣竊詳反坐之法本謂如告人放火而實不曾  
放火告人殺人而實不曾殺人誣詔善良情理重害  
故反其所坐然有司亦不敢卽行多具情法奏取聖  
裁今愚民無知方其爲奸胥猾吏之所屈抑中懷冤  
憤訴之於官但聞某人曾以罪勒罷又有許告指揮  
則遂於狀內夾帶冒役之語村塾小民何由身入官

府親見案牘小有差誤亦當未減以通下情縱使州郡欲治其虛妄驀越之類亦自有見行條法笞四十至杖八十極矣與反坐之法有何干涉若一言及吏人冒役便可搢撫置之徒罪則百姓被苦豈復敢訴吏何其幸民何其不幸也自昔善爲政者莫不嚴於馭吏厚於愛民今乃反之事屬倒置兼見今諸處冒役吏人雖究見是實亦不過從杖罪科斷罷役而已未有卽置之徒罪者豈有百姓訴吏人冒役却決脊杖之理臣本欲卽按治筠州官吏又緣有上件乾道六年八月二日臣僚陳請到指揮顯見因此陳請致得州郡憑藉用法深刻臣蒙恩遣使一路出自聖知拔擢苟有所見不敢隱默欲望聖慈更賜詳酌如以臣所奏爲然卽乞特降睿旨寢罷乾道六年八月二日因臣僚陳請所降指揮庶使百姓不致枉被深重

刑責臣下情獲通登吏利有畏懼天下幸甚

除寶謨閣待制舉曾黯自代狀

臣伏觀從政郎總領淮東軍馬錢糧所準備差遣曾  
黯克承家學早取世科操行可稱文詞有法臣實不  
如舉以自代

辭免轉太中大夫狀

中大夫充寶謨閣待制提舉江州太平興國宮陸某  
狀奏臣以修進兩朝實錄今月二十三日伏准告命  
授臣太中大夫依前充寶謨閣待制提舉江州太平  
興國宮者序進一階雖循故事擢登四品實出殊私  
勞薄賞醲人微恩重而况臣遭逢頗異涉歷寢深四  
朝嘗綴於廷紳八十更持於從橐惟寵光之永絕庶  
視息之少延敢控愚衷冀回鴻造

薦舉人材狀

太中大夫充寶謨閣待制致仕臣陸某近承紹興府  
牒備承尚書吏部符准都省劄子奉聖旨節文令前  
侍從各舉人材三兩人臣爲已致仕累年竊慮與在

外侍從見任藩郡及宮觀人事體不同遂具申審今  
淮都省劄子照得寶謨閣待制致仕俞澂薦舉萬夢  
實等訖劄送臣照會者臣切見宣教郎知臨安府臨  
安縣鞏豐材識超卓文辭宏贍從政郎前隨州州學  
教授王田學問淹貫議論開敏以上並可備文字之  
職文林郎監潭州南嶽廟趙蕃力學好修杜門自守  
入仕以來惟就祠祿今已數任若將終身或蒙朝廷  
稍加識拔足以爲靜退之勸抑躁競之風於聖時不  
爲無補如或不如所舉甘坐責罰

渭南文集卷第五

渭南文集目錄  
卷第六

謝解啓

賀台州曾直閣啓

賀曾祕監啓

賀謝提舉啓

賀禮部曾侍郎啓

賀辛給事啓

賀福州察推啓

賀何正言除左司諫啓

賀湯丞相啓

除刪定官謝丞相啓

謝內翰啓

謝諫議啓



渭南文集卷第六

謝解啓

倦遊場屋分已歸耕首置賢書出於過聽得非其分  
榮不蓋慚伏念某行己迂疎稟資窮薄生逢聖代豈  
願老於漁樵性嗜古文了不通於世俗因息四方之  
志專爲一壑之謀比遊都城適睹明詔復踴躍而自  
獻信習氣之難除內負初心外慙舊友然而廢放已  
久盡忘科舉之章程得失旣輕頗有山林之氣象譬  
之進昌歎於玉食陳侏儒於燕朝方以怪而見珍故  
雖樸而不廢恭惟某官行爲世表經爲人師早學長  
安識子雲之奇字晚遊吳會得中郎之異書心術正  
而無邪文章簡而有法憤彫蟲之積弊疑草莽之可  
收遂致庸虛輒先豪俊自知不稱敢辭同進之爭名  
所懼流言竊謂主司之好異其爲愧悚實倍尋常

賀台州曾直閣啓

恭審寵辭使節移鎮便藩上待老成惟恐弗當其意  
士聞靜退自消競進之心凡有識知誰不驩喜恭惟  
某官淵乎似道清而有容古學名家鬱爲諸儒之領  
袖高文擅世坐還兩漢之風流蚤踐清華屢當要劇  
民依愷悌之政吏畏道德之威不言而令已行寡欲  
而人自化好直無矯枉之過爲善無近名之嫌歷考  
平生追配古人而奚愧中更俗吏益知儒者之有功  
比由真館之宴閑起奉外臺之委寄翔而後集汎然  
敢辭子房避三萬戶之封曼容至六百石而去當宁  
爲之太息舉朝仰其高風故擇名邦示優者德然而  
公議所屬久安實難第恐賜環之來弗容坐席之暖  
某早嘗問道晚益受知春服方成悵又違於師範郡  
齋猶冷冀深衛於生經

賀曾祕監啓

恭審越登文陛進冠廟臺簡冊先幸孰諱太平之無  
象薦紳歎息共欣大老之來歸誠爲中外之榮觀非

魁偉之臣士鄙刑名功利之學政術旣斥夫卑陋國  
勢自極於尊安豈惟右文飾治之方是亦折衝消萌  
之要至於主盟儒道典領書林必求名勝之宗尤極  
清華之選不圖近歲頓異前規老吏亦驚茲豈膏梁  
之地遺編何罪至遭鋒鏑之腥廷範之汙清流哥奴  
之非時望較之於此誠何足言天未墜於斯文上眷  
求於舊德恭惟某官文貴乎道氣合於神學稽古以  
知天心集虛而應物舊聞入洛之盛事疑於古人追  
數過江之諸賢屹然獨在雖身居湖海之遠而名滿  
覆載之間友化人而遊帝居顧肯復求於外物登泰  
山而小天下蓋嘗俯陋於諸儒昨者法宮決事之初  
起於琳館燕居之際力歸使節自乞守符觀其勇退  
於急流真若無意於斯世迫功名之不赦凜風節之  
愈高姑復領袖館閣之遊行卽几杖廟堂之上某自  
惟幸會最辱知憐識度關之雲距今十載從浴沂之

樂終後諸生孤蹤愈遠於師門精意空馳於夢想

賀謝提舉啓

伏審顯膺帝制起擁使華雖輿論歉然謂未究大賢之蘊然用人如此誰不知公道之行恭惟某官躬真獨簡貴之資蘊篤實誠明之學早並遊於洛下晚獨步於江東談笑多聞文章爾雅履常應變雖與時而偕行據古守經蓋絕世而獨立風采聞於天下勞烈簡於上心自去清班久安真館付功名於昨夢若無意然顧富貴之迫人恐不免耳迨法宮之決事付便郡以優賢曾未踰年已聞報政入膺三接之寵出臨千里之畿明詔始傳吾黨相慶以謂名流之施設當有前輩之規摹班超之策平平陽城之考下下至於俗吏乃求奇功所願一洗簿書之塵庶幾少稱臺閣之望此自明公之所及豈須賤子之具陳冒瀆之深

慚惶無措

賀禮部曾侍郎啓

衆望所歸九遷猶以爲緩惟是老成之用式昭至治  
之符凡有識知誰不驩喜竊考六官之制本皆三代  
之餘惟宗伯之清華極近臣之遴選誠使此地常得  
其人則朝廷日尊自弭未形之患論議守正亦折羣  
邪之萌一昨多難寢忘大體刑名錢穀獨號劇曹文  
物筭常僅同虛器蓋道由時而升降官以人而重輕  
苟凡材非據於其間則舊章何恃而不廢孰謂斯文  
之幸復聞公議之伸恭惟某官直哉惟清淵乎似道  
心至虛而善應名弗求而愈高紬繹六經推明上世  
之絕學度越兩漢追配先秦之古文早並遊於洛中  
晚獨步於江左人誦其德家有其書使少貶於諸公  
已亟升於華貫顧久幽而彌厲凜自信之不回上屢  
興見晚之嗟公猶懷勇退之志勉收功業於無復意  
之後起踐富貴於不得已之餘黃髮皤然德容穆若  
昔者慶曆之盛側席而致衆賢元祐之初加璧而聘

諸老今茲盛事可謂無慚然猶漸進於省中未足大  
慰於天下竊謂德齒之貴宜登師保之崇入則几杖  
三雍之間出則卷繡百工之上使勳貴斂衽畏楊綰  
之清朝堊洗心化毛公之儉紀話言於竹帛肖形像  
於丹青垂之無窮然後爲稱某頃陶善誘嘗辱異知  
雖借勢於王公大人非迂愚之敢及惟侍坐於先生  
長者尚夢寐之不忘逖聞綸緋之傳獨阻門闌之慶  
仰懷曩遇不勝下情

賀辛給事啓

恭審光奉制書就升鉅鎮用人惟己上方詢事而考  
言知我其天公豈枉尋而直尺世不容而何病道有  
命而後行雖殿藩猶屈於經綸然親擢益知於眷注  
搢紳頌歎道路驩欣伏聞先王相我後人上天爲生  
賢佐若時大任之降將啓非常之元故必雍容回翔  
以養其度濟之才接擢片政以稽天運退之望遣之  
險難以勵其志待之耆老以全其能周公居東歸相

於偉然物理殆非於偶爾恭惟某官氣守剛大性資  
方嚴其在朝廷有金玉王度之益其位嶽牧有股肱  
帝室之勞指朋黨於蔽蒙膠漆之時發奸蠹於潛伏  
機牙之始庭叱義府面折公孫可否一語而不移利  
害十年而後驗人服其識家誦其言皓首來朝方共  
推於宿望丹心自信寧少貶於諸公洗鄙夫患失之  
風增善類敢言之氣頰仰無媿進退兩高不可誣者  
忠邪之情不可揜者是非之實出守未幾見思已深  
惟是謀帥之難孰先舊德之舉然而方政機之虛席  
宜召節之在途開慰斯民始自今日某迂愚不肖窮  
薄多奇雖道德初心之已非猶節義大閑之可勉側  
聞休命深激懦衷輒忘奏記之狂蓋出執鞭之慕仰  
祈閔量曲貸嚴誅

富福州察推啓

識面卜鄰固常懷於鄙志杜門掃軌殊未接於英游

於此相逢慨然永歎恭惟某官城南舊望江左名流  
高韻照人清言絕俗過眼不再真讀五車之書落筆  
可驚倒流三峽之水豈有如公之人物猶令隨牒於  
海邦政恐驛召之行弗容席暖之久某奔馳斗粟流  
落二年久親柱後之惠文高東牀頭之周易政須名  
理之語一洗簿書之塵

賀何正言除左司諫啓

恭聞親詔登用大賢以白首魁偉之臣膺明時諫諍  
之任善類相慶公道遂行竊以逆指犯顏人疑於甚  
難而君子謂之易盛朝治世衆安於無事而識者以  
爲憂然非身居獻替之官與夫素著中外之望雖抱  
此識何自而言邈乎太平之難逢考之前史而可見  
以正人遺聖主實惟祖宗敷佑之心而公議在朝廷  
豈非廟社無疆之福恭惟某官心潛百聖學貫羣經  
老成之風師表一世直養之氣充塞兩儀立朝寬大  
而持平論事雍容而守正虛舟觸物此自信其無心

之功非獨誠僞不可以欺要之忠邪久而自辨止眷  
既厚人望又歸遂當登四輔之聯豈久置七人之列  
某頃以樸學嘗預諸生雖在泥塗猶是門闌之舊物  
竟無名第亦竊場屋之虛聲敢俟明公勳業之成勉  
繼真人歌頌之作不足爲報姑盡此心

賀湯丞相啓

恭審顯膺典冊進冠公台廷告未終摺紳相慶郵傳  
所及夷夏歸心煥君臣嘉會之逢侈廟社無疆之福  
恭惟某官民之先覺國之宗臣精義探繫表之微英  
辭鼓天下之動至誠貫日歷萬變而志意愈堅屹立  
如山決大事而喜愠不見一昨力辭重任之降屈居  
次輔之聯三年有成九功惟敘方當詔令之誕布孰  
測謀謨之所從凡有大政事之慰斯民咸曰右丞相  
之告於上雖家置一喙以頌德士予千金而示恩竊  
揆其情未至於此蓋廟堂之寄代天而理物帷幄之

算經遠而折衝平居用小大之材欲其披肝膽以自  
盡一日付疆場之事欲其捐性命而不辭自非有以  
素服衆心則將誰與共濟大業晉文側席於子玉回  
紇下拜於汾陽王商以忠謇立朝則單于不敢仰視  
平津以媿媿充位則淮南謂若發蒙自昔論世之盛  
衰莫如置相之當否譬猶震風凌雨之動地夏屋愈  
安鴻流巨浸之稽天方舟獨濟人望所屬國體自尊  
今者大明弼亮之勳正席辯章之任守文致理將見  
隆古極治之時應變制宜必有仁人無敵之勇聖主  
以此屬元輔學者以此望真儒行或使之天所命也  
某猥以孤遠辱在記憐如其少道衣食之憂猶能頌  
中興之盛德必也遂老江湖之外亦自號太平之幸  
民窮達皆出於恩私生死不忘於報稱

除刪定官謝丞相啓

收置金陸匡已踰於素望功鉅事仍俾效其寸長  
神觀頓還塵埃一洗欲敘丹衷之感不知危涕之橫

勞跌宕文辭顧雕蟲而自笑低回久矣感歎悽然使  
有一人之見知亦勝終身之不遇然而稟資至薄與  
世寡諧在鄉閭則里胥亭長之所叱訶仕州縣則書  
佐鈴下之所蹈藉聲名湮晦衣食空無方所向而輒  
窮已分甘於永棄侵尋末路邂逅殊私招之於衆人  
鄙遠之餘挈之於半世浮沉之後既賞音於一旦又  
誦句於諸公豈料前史之美談乃獲此身之親見茲  
蓋伏遇某官斯民先覺吾道宗師大學誠明上下同  
流於天地至仁溥博遠近一視於華夷和氣行禮樂  
之間治道出政刑之外惟公故無所不取惟大故無  
所不容訖令頑鈍之資亦預甄收之數重念某家世  
儒學非有旂常鍾鼎之勳交友漁樵又無金張許史  
之助特緣薄技獲齒諸生形顧影以知歸口語心而  
誓報死而後已天實臨之

謝內翰啓

來自遠方驟參要局知其愛閑而多病故爲滿俗吏之塵勇於悼屈而哀窮故使汙清流之末繫禁近吹噓之過蒙廟堂選拔之優俯仰以思愧懼交至伏念某讀書有限識字不多歲月供簿領之勞衣食奪山林之志窮雖已甚狂不自懲性本懦孱輒妄希於骨骸仕由資蔭乃深惡於膏梁坐此湮阨而莫收未忍依違而少貶比遊輦轂久困氛埃望見車騎之雍容傳誦文章之閎麗不勝慕鄉求備使令門墻纔許其一登聲價已增於十倍夫富貴外物惟事賢可謂至榮父子雖親然相知猶或不盡曾是疎遠至孤之迹又無瓌奇可喜之能不自省其何繇乃遽叨於斯遇非常之幸從古罕聞此蓋伏遇某官自明而誠養氣以直行著四方之防範文專一代之統盟勤於教人務傳聖師之道廣於求士用報睿主之知豈謂孤生亦蒙至意稱於天下曰知己誰復間然雖使古人而復生未易當此惟誓堅於名節庶不辱於恩私

謝諫議啓

來自遠方驟參要局因書生鉛槧之業使效尺寸之  
長脫俗吏簿領之煩曲從疏墊之性儻非恩舊每賜  
揄揚自顧缺然何以得此伏念某讀書有限識字不  
多歲月供道路之勞衣食奪山林之志窮雖已甚狂  
不自懲材本懦弱輒妄希於骨鞭仕由資蔭乃深嫉  
於膏梁衆惡所叢孤生餘幾自頃竝遊於場屋亦嘗  
辱遇於宗師徒竊虛聲莫躋真賞一斤遂甘於蹭蹬  
殘年絕望於騫騰此在常情所宜顯棄豈謂并容之  
度未移宿昔之私旣許瞻君子盛德之容淵乎似道  
又使知大人接物之際歡然有恩訖致庸虛誤蒙甄  
錄此蓋伏遇某官養氣以直自誠而明大學中庸發  
揮千歲之旨生民清廟主盟一代之文吾道由此而  
復傳善人有恃而不恐施及區區之舊物不忘眷眷  
之深情求麤稱於門墻惟益堅於名節死而後已天  
實臨之

101311763

渭南文集卷第六

中華民國玖壹年拾月拾捌日贈送



珍做宋版印



國家圖書館



002452247

